



**ATASSUT**  
**Steen Lyngé**

**UPA15/11-1**  
**11.03.2015**

**2013-imut Nunatta Karsiata naatsorsuutaasa akuersissutigineqarnissaannik siunnersuut.**  
(Aningaasaqarnermut Aatsitassanullu Naalakkersuisoq)

2013-imut Nunatta Karsiata naatsorsuutaasa akuersissutigineqarnissaannik siunnersuut  
Naalakkersuisunit saqqummiunneqartoq ATASSUT-mit makkuninnga oqaaseqarfiggissavarput:

Nunarsuarmi aningaasaqarnikkut pissutsit atuuttut nunatsinni kingusinnerusukkut malunniuttarnerat nunatta karsiata 2013-mi uppersaataaalluartutut oqaatigineqarsinnaaqqooqaaq, tassami pisuussutit uumassusillit eqqarsaatigalugit nunatta avammut niuernera pitsanngoriaateqarsimagaluartoq, pingaartumik sanaartornikkut ingerlatsinerup annikinnerusimanerata kingunerisaannik nunatta karsiata naatsorsuutigisamit nikinganeranut pissutaaqataalluinnartoq oqaatigineqarsinnaavoq.

Aningaasanut Inatsimmi taamanikkut Inatsisartuusunit akuerineqarsimasoq eqquutissagaluarpat 103 mio. kr.-inik amigartoortoqartussaagaluartoq tamanna 70,8 mio. kr.inik sinneqartoornermik mumisinneqarsimavoq.

Taamaattorli naatsorsuutigisamit 173,8 mio. kr.-inik nunatta karsiata pitsanngoriaateqarsimanera sanaartornikinnerulernermik taamaallaat pissuteqarsimangilaq, aammali Naalakkersuisoqarfinni sukannersumik aammalu aningaasaliunneqartut iluini atuilluarnissamik sulisoqarsimaneramik takussutissiisoq ATASSUT-mit isumaqarpugut.

Assersuutigiinnarlugumi ingerlatsinermut aningaasartuutissatut missiliunneqarsimasunut sanilliullugu 29 mio. kr.-inik atuinikinnerusoqarsimavoq, aammalu ATASSUT-mit iluarisimaakkatsinnik maluginiarnarpoq peqqinnissaqarfik, ilisimaneqartutut ukiut tamarluinnangajaasa aningaasaliissutit qaavisigut annertuumik aningaasaleqqittoqarnissaannik pisariaqartitsiviusartoq 2013-mi 5 mio. kr.-inik atuinikinneruffiusimavoq.



## ATASSUT INATSIARTUNI

---

Taanna immikkut assersuutigereerlugu maluginiarnarpoq Naalackersuisoqarfiit allaffissornikkut aningaasartuutigisassatut missiliorneqartumut sanilliullugu 16 mio. kr.-inik atuinikinnerusimasut, ATASSUT-mit nalilerparput tamanna ersersitsisoq allaffissornermut aningaasartuutit annikillisarneqarnissaannik kissaateqarneq aammalu siunnerfeqarneq ajunngitsumik malunniukkiartulersimasoq.

Muminganilli Ilinniartitaanermut Naalackersuisoqarfik missingersuummut sanilliullugu 4 mio. Kr.-inik ataatsimut isigalugu atuineruffiusimavoq, maluginiarnarporlu ilinniarnertuunngorniarfiit naatsorsuutigisamit aningaasartuuteqarnerusimanerannik tamanna pissuteqarsimasoq, pingaartumik maluginiarnarluni Aasianni GU-mi ilinniartitsisut qaangiuttoortariaqartarnerannik pissuteqarsimasoq, ATASSUT-mit neriuppugut sulisoqarniarnikkut ajornartorsiuteqartoqarsimappat, tamanna maanna qaangiutereersimassasoq.

Naalackersuisoqarfiit tamaasa matumani immikkut oqaaseqarfiginngikkaluarlugit ATASSUT-mit neriuppugut pisariillisaaneq aammalu allaffissornikinnerunissamik anguniagaqarneq ukiuni tulliuuttuni ingerlatiinnarneqarumaartoq.

Isertitanut tunngatillugu ATASSUT-mit nuannaarutigalugu maluginiarparput naatsorsuutigisamit 48 mio. kr.-inik nunatta karsia isertitaqarnerusimasoq, naak massa Naalagaaffimmit tapiissutit suli annersaagaluartut aammalu nunarsuarmi aningaasarliornerup sunniutai malunniusimagaluartut nunatta aningaasaqarnikkut imminut napatikkiartuaarnera ataatsimut isigalugu annertusiartortoq ATASSUT-mit naliliivugut.

Sanaartornermut tunngatillugu ATASSUT-mit nuannaarutigalugu maluginiarparput suliassatut aningaasaliiffigineqarsimagaluartut uninngaannalersimasulli annertuumik iluarsaanneqarnerat ingerlanneqarsimammat, aammalu siumut isigisumik sanaartornermut iluarsagassanullu aningaasaateqarfimmi aningaasat uninngatinneqartartut annikilliarortinneqarnissaannik aningaasallu inuiaqatigiinni sulisinneqarnissaannik siunnerfeqarneq tamaviaarullugu ingerlanneqarmat, naallu massa aningaasaateqarfimmi uninngasuutigineqartut suli amerlavalaaraluartut isumalluarpuqut pingaartumik Namminersorlutik Oqartussat Kommunnillu



## ATASSUT INATSIARTUNI

---

piviusorsioortumik sanaartornermut tunngatillugu missingersuusiortarnerisigut uninngasuutit ukiuni tulliuuttuni suli annerusumik ikilisarneqarsinnaasut.

Soorunami 2013-mut nunatta karsiata naatsorsuutai Inatsisartunit akuerineqartigatik Inatsisartut Kukkuersiunermit Ataatsimiititaliaannit misissoqqissaarneqartussaapput, taamaammallu ATASSUT-mit siullermeerinninnermi suliassa qarfiit tamaasa itisilerlugit oqaaseqarfiginngikkaluarlugit naggataatigut erseqqissaatigissavarput Naalakkersuisut saqqummiussinerminni siunissami suna naatsorsuutigisinnaaneripput ilanngullugu oqaaseqarfigisaat matumani isumaqataaffigatsigit naqissusissavarput.

Taamatut oqaaseqarluta ATASSUT-mit inassutigissavarput 2013-imut Nunatta Karsiata naatsorsuutaasa akuersissutigineqarnissaannik siunnersuut aappassaaneerineqartinnagu Inatsisartut Kukkuersiunermit Ataatsimiititaliaanut suliassanngortinneqassasoq.